

Wakaf alternatif depani kos hidup tinggi

UTUSAN MALAYSIA 21/7/2023 M/S: 37

KUALA LUMPUR: Wakaf berpotensi menjadi sumber kewangan alternatif dalam kalangan komuniti berpendapatan rendah yang berdepan cabaran kos sara hidup yang tinggi.

Menteri di Jabatan Perdana Menteri, Hal Ehwal Agama, Datuk Dr. Mohd. Na'im Mokhtar berkata, wakaf memainkan peranan penting dalam pembangunan ekonomi dan masyarakat.

Menurut beliau, wakaf menyerlah sebagai instrumen kewangan sosial yang dinamik dan lebih fleksibel dari segi spesifikasi penyumbang, penerima dan implementasi berbanding zakat.

"Pemeriksaan instrumen kewangan Islam dengan unsur wakaf seperti bon-bon dan saham wakaf, pertumbuhan platform dana khalayak atau *crowdfunding* yang patuh syariah, serta integrasi teknologi terkini seperti *blockchain* dan *fintech* dalam pengurusan dana wakaf merupakan batu loncatan penting untuk inovasi dan perkembangan wakaf di Malaysia.

"Tambahan pula, kesinambungan instrumen berunsurkan kewangan sosial Islam seperti wakaf mampu menyumbang kepada kewujudan inklusi

kewangan yang dikenal pasti sebagai faktor penting dalam merealisasikan beberapa matlamat pembangunan lestari (SDG) seperti pembasmian kemiskinan dan penjanaaan pekerjaan berkualiti," katanya.

Beliau berkata demikian ketika merasmikan Persidangan Wakaf dan Pasaran Modal Islam anjuran Suruhanjaya Sekuriti Malaysia (SC) yang turut dihadiri Pengerusi SC, Datuk Seri Dr. Awang Adek Husin di sini, semalam.

Tambah beliau, kepekaan dan kesedaran masyarakat negara ini dalam memperkakan wakaf sebagai sumber ekonomi dan pembangunan sosial amat membanggakan serta menggalakkan.

"Transformasi yang berlaku dalam aspek pengurusan wakaf di Malaysia amat menggalakan, selain daripada usaha-usaha yang dijalankan oleh pihak pengurusan wakaf seperti Majlis Agama Islam Negeri-Negeri (MAIN)," katanya.

Mohd Na'im berkata, SC perlu diberi pengiktirafan sebagai peneraju dalam usaha pembangunan dan penerapan konsep wakaf dalam industri pasaran moda.